

TUSI AOGA ASO SA VASEGA MATUTUA

FA'ASOLOGA O MATAUPU O LE TUSI

<u>ASO/MASINA</u>	<u>MATAUPU</u>	<u>TUSI FAITAU</u>
Aokuso 02, 2026	“FANAU ITI”	Mataio - 18:1-14
Aokuso 09, 2026	“O LE A SE MEA OUTE MANA'O E TALI AI I SE VALAAU”	Ieremia - 1:4-10
Aokuso 16, 2026	“TAUTUA MA LOTO MAU”	1 Peteru - 4:1-11
Aokuso 23, 2026	“MEAALOFA O LE POTO”	2 Nofoaiga Tupu 1:7-12
Aokuso 30, 2026	MATAUPU FA'AMANATU O AUKUSO	
Setema 06, 2026	“O AI TATOU TE TALITONU IAI”	Isaia - 36:13-20
Setema 13, 2026	“O LE PULE A AI?”	Mataio - 21:23-27
Setema 20, 2026	“TA'IALA MO LE AIGA”	Esoto 21:2-11
Setema 27, 2026	MATAUPU FA'AMANATU O SETEMA	

OKETOPA 04, 2026 - OKETOPA 25, 2026.

TAPENAGA MA MALOLOGA MO LE LOTU A TAMAITI.

Novema 01, 2026	“TAULAGA OLA”	Roma 12:1-8
Novema 08, 2026	“O LE GALUEGA A PAULO I NU'U ESE”	Roma 15: 14-21
Novema 15, 2026	“LOTO ATU I LE 'OA”	1 Timoteo 6:6-11
Novema 22, 2026	“POGISA MA LE MALAMALAMA”	1 Tesalonia - 4:13/5:11
Novema 29, 2026	MATAUPU FA'AMANATU	
Tesema 06, 2026	“LEOLEO MAMOE LELEI”	Esekielu – 34: 20 - 31
Tesema 13, 2026	MATAUPU FA'AMANATU O TESEMA	

**MANUIA TELE LE KERISIMASI MA LE TAUSAGA FOU. MANUIA LE TU'UAGA,
FEILOA'I I LE 2027.**

ASO SA –AOKUSO 02, 2026

MATAUPU: “FANAU ITI” (The little ones)

TUSI FAITAU: MATAIO - 18 : 1-14

SINI: Ia manino fanau i lo latou taua i le silasila a le Ali'i o Iesu.

FESOASOANI MO FAIAOGA: Malo le soifua manuia i ā tou Susuga a faiaoga, ua tatou taunu'u i le amataina o le 'afa lona lua o ā tatou Aoga Aso Sa o lenei tausaga. Tautuana pea le taua o le su'esu'e atili i la tatou mataupu ma ia maua lava se taimi e faitau ai le Tusi Paia e ta'iala ai su'esu'ega o le mataupu. Manuia le fa'asoa i fanau.

FESOASOANI MO LE MATAUPU: “O ai ea e sili?” O lagona ma manatu o le 'au so'o ua mafua ai 'ona tu'ufesilisili; Po'o ai ea ua sili i le malō o le lagi? Ua eseese lagona fa'aalia o le 'au so'o ma ua manatu e sili ā le tagata i ona manatu. Peita'i, o lea ua fetalai manino le Ali'i e fa'atauā tamaiti e pei 'ona ia aumai ai le tamaitiiti ma ia fa'atū ia te ia i ō latou luma. Ua va'avaai ma matau pea le 'au so'o a 'ua fetalai atu Iesu; E moni ou te fai atu iā te outou, a lē liua outou ma avea fa'apei o tamaiti , tou te lē sao lava i le malo o le lagi. O le taumafai o le Ali'i 'ia maua e le 'au so'o le loto maulalo, fa'apei o loto o tamaiti 'ona mautinoa lea le sili i le malo o le lagi. Ua fa'ailo e le Ali'i le tāua o le faia o mea uma i le loto maulalo, auā o lē faia lea va'aiga ua fa'ailoa lona talia o Ia ma talia lona Tamā sa auina mai o Ia. O lo'o tu'uina mai nisi ata e fa'ailoa ma fa'amanino ai le tulaga o le maua o le loto maulalo auā o lalo e maua ai malō. Leitioa fo'i le upu a le atunu'u; O lalo e maua ai malo, o lalo e saili iai le tagata, ma e tatau 'ona tumau i le loto maulalo, e saili ma maua lea o le tulaga tatou te faia mo le ola o le tagata. O a'oa'oga a le Ali'i e tu'uina mai 'ina 'ia tapena ai loto o le 'au so'o, aemaise lava i tatou ma lo tatou ola finau atu mo le Atua. O le feau fo'i lea mo tatou fanau, e sili ona taua tatou ma o le soifuaga fo'i lea e tatau 'ona tatou faia, o le loto maulalo fa'apei o tamaiti, ma 'ia liua i tatou pei o le tamaititi, auā o le tamaititi e loto mamā, e agamalū ma loto maulalo. O le ata o le alofa, auā o lea ua taologologo pea le talalelei, ia avea ma tamaiti, 'ona toe fa'afouina lea o le mafaufau ma le agaga, ma iloa atu ai le Atua lē na 'auina mai lō tatou Ali'i alofa. Taua le fa'alogoma usita'i ma 'ia soia ia le finau i fa'atonuga tu'uina mai e lo tatou Ali'i. Ia tumau i le loto maulalo auā o lalo e maua ai malo. Aua le vaoia e pei 'ona manatu iai le 'au so'o ma i latou uma na manatu māmā i fanau. Soia le va'ai fa'atauva'a, auā o lona finagalo ia tauā tagata uma ma soia le ta'u valeina o isi uso a tagata.

GALUEGA FA'ATINO: Fa'atumu mai le faitauga lea o le Tusi Paia; O lea, 'ua ō ane ai le 'au so'o iā, 'ua fa'apea ane, “O ai e i le o le (itūaso, Iesu, 'ea, sili, malō, lagi)

A'OA'OGA: Taua lava le fesili i fanau po'o le ā ni a'oa'oga ua maua i le tala.

1. Ia tumau i le maua o le loto maulalo, auā o lalo e o'o ai i le fa'aeaina.
2. Ia fa'atauā pea tamaiti, ma 'aua le lē ama'iaina i latou.
3. Fa'alogoma usita'i i le finagalo momoli mai o Iesu iā te'i tatou.
4. Ia tutusa tagata uma i lau silasila, soia le ta'u fa'atauva'aina.

PESE: Pese ma Viiga (Pese 383)

TATALO: Fa'aatoa e lau Afio la matou fa'asoa ma ia maua e fanau uma le manuia ma le fiafia pea i lau Afio. Fa'amagalo fanau ma i matou uma ma ia fa'atasi mai i sauniga a matou faia nei. Amene!

Manuia le tapua'iga i le Atua!

ASO SA –AOKUSO 09, 2026

MATAUPU: “O LE Ā SE MEA OU TE MANA’OMIA E TALI I SE VALA’AU” (What do I need to answer the call)

TUSI FAITAU: IEREMIA - 1: 4-10

SINI: Ia iloa e fanau po’o le a lo tatou valaa’uina, tataua lava ona fa’ataunu’u auā o le mea mautinoa o lo’o fa’atasi mai pea le Atua vala’au, fa’alagolago ia te Ia e manuia ai.

FESOASOANI MO LE FAIAOGA: Fa’afetai fa’amalosi i lenei taeao fou, malo le usu auā le fa’atinoina o la tatou aoga i lenei taeao. Tautuana pea lau tapenaga, manatu lava o sina fesoasoani mo lau tapenaga auā e le atoa i sa’u fesoasoani la tatou mataupu. Taua lava le silasila i le Tusi Paia e atoa ai lau fa’asoa atu i fanau. Manuia le fa’asoa atu i fanau.

FESOASOANI MO LE MATAUPU:

O le vala’auina o Ieremia, na valaa’u a’o iai i le manava o lona tinā, e pei ona fa’ailoa i le fuaiupu e 5; “Na a’u iloa oe a o le’i faia a’u i le manava; na a’u fa’apa’iaina oe a o le’i fānau mai oe, na a’u tofia oe e fai ma perofeta i nu’u.” O tofiga mai le Atua, e pule ai le Atua i mea uma, e ui lava ina manatu Ieremia ‘ua na’o ia o se tamaititi, ua ia leiloa tautala atu, a’o lea e manino le fetalaiga a le Atua; “Aua e te fa’apea, O a’u o le tamaititi, auā o i latou uma ‘ou te ‘auina atu iai oe, ‘e te alu lava iai, o mea uma fo’i ou te fai atu ai iā te oe, e te faia lava.” O le mea mautinoa lea na lolo ai lona manatu i lona vala’auina, e fa’atonu folau le Atua i mea uma. Manaia upu fa’amalosi a le Atua iā Ieremia; “Aua e te fefe iā te’i latou; auā ou te iā te oe e lavea’i ‘iā te oe, ua fetalai mai ai le Ali’i.” Manaia le tu’ualalo a le mataupu, O iinei na fa’aloaloa ai lea e le Atua o lona a’ao ‘ua pa’i mai i lo’u gutu; ‘ua fetalai le Ali’i ma tu’u upu i le gutu o Ieremia e tautala ai. O le tali vala’au, e tauā le fa’alogo ma usita’i i le fetalaiga a le Ali’i. Ia maua’ a loto ma maua le loto maulalo e talia ai, Mana’omia le tumau i le Ali’i e pei fo’i o Ieremia na ia iloa lona fa’atauva’a, leiloa tautala atu, a’o tofiga a le Atua e lē malamalama ai le tagata. Fanau ‘ua vala’auina i tatou e le Atua e tala’i lona finagalo. Ia fai ma avefea’u e fiafia e tala’iina lona finagalo, tatou usita’i i o tatou matua a ‘ia sili ‘ona usita’i i le Atua vala’au mai pea. Taua lea mataupu mo lo tatou ola fanau, ia fa’alogo ma usita’i i o tatou matua i le Ali’i, o ā valaa’u e valaa’uina ai i tatou ia talia ma faia ma le filemu o le Atua, auā o ia e fesoasoaniina i tatou uma.

GALUEGA FA’ATINO: Ia fai ni fesili i fanau; Po’o le ā se lagona e tupu i le tagata pe afai e o’o mai le vala’au, po’o se vala’auina ae o lo’o tumau pea i le laititi? E le iloa tautala? E leiloa le mea e tataua ona fai i le vala’auina? Pe tataua ona fai pe tu’u? Manaia lava le fa’asoa pea ina ia manino le mataupu.

A’OA’OGA: Taua le fesili pea i fanau auā ni a’oa’oga mo le tala.

1. Fa’amoemoe i le Atua o ia na te fa’atonutonu folau i le vala’auina.
2. A vala’au mai le Atua talia loa ma faia.
3. Aua le fa’atūtugātā pe ā iloa le mea e tataua ona fai.
4. E fa’agaganaina e le Atua gutu o tama valevale.

PESE: Pese ma Viiga. (Pese 195)

TATALO: Fesoasoani mai pea lau Afio i ō matou loto ma fa'amalamalama mai la matou fa'asoa e ala i lou Agaga, fa'amagalo i matou ma tumau mai pea i luga o lau fanau. E ala iā Iesu. Amene.

Manuia le Aso Sa ma Sauniga!

ASO SA - AOKUSO 16, 2026

MATAUPU: "TAUTUA MA LOTO MAU" (Service and humility)

TUSI FAITAU: 1 PETERU - 4: 1-11

SINI: O le soifua loto mau i le Atua e fiafia ai e fa'aauau le tautua i so'o se vaega e mafai ai.

FESOASOANI MO LE FAIAOGA: Malo fa'afetai i ā outou Susuga a faiaoga, fa'amalō onosa'i i fe'au ma galuega o lenā fo'i vaiaso 'ua mavae atu. Ia iai pea le Agaga o le Atua i tapenaga o la tatou mataupu fa'asoa. Ia tau tatā pea i le Tusi Paia e maua ai se atoa o la tatou mataupu. Taua fo'i le fa'amasani o tamaiti e toa'aga e faitau le Tusi Paia ma malamalama atili ai. Manuia le fa'asoa i fanau.

FESOASOANI MO LE MATAUPU: O lo'o taoto la tatou fa'asoa i le vaega e fa o vaeveaga o le tusi a Peteru; O le loto maulalo ma le ola tautua. O le ata manino o le fa'amaoni fa'a-Kerisiano, auā 'ua tigaina Keriso i le tino 'ia fai ai ma 'au'upega iā te outou fo'i lea lava loto, auā o lē ua tigā i le tino, ua tu'u e ia le agasala. Ua alaga Peteru i apoapoaiga eseese i tagata o lona vaitau. Ua ia fa'aali tino le Ali'i, lona toetu ma lona manumalō mai faigata o le olaga, lea ua fai ma fa'amanatu atili ia soia ia le manatu ma toe usiusita'i i tu'inanau o tagata, a ia usiusita'i i le finagalo fai to'atasi o le Atua. Le manatu lenā o Peteru na ia fa'ailoa atu, e mulimuli pea i ta'ita'iga a le Agaga e manuia ai. O lona fo'i lea manatu ua tigaina Keriso i le tino, ia fai ai ma 'au'upega iā te outou fo'i lea lava loto, auā o lē ua tigā i le tino, ua tu'u e ia le agasala. Ia aveese ai le tu'inanau o tagata i aso totoe o le ola, ae usiusita'i i le finagalo o le Atua. Ua fa'ailoa e Peteru le soifua tautua, ma loto mau i le Atua ma lana fa'asinomaga, ia faia mea uma i le alofa. Auā o le alofa e fusia ai mea uma, ia mataala ma fa'autauta lelei, ma tumau i le tatalo. Tautua ma loto mau i le Atua, e alofa ai le tasi i le tasi, o le mea fo'i lea afai e tautala se tasi, ia tusa ma le afioga a le Atua, afai fo'i e auauna se tasi, ia tusa ma le malosi ua foa'iina mai e le Atua, ina ia viia le Atua i mea uma lava, ona o Iesu Keriso. O le fe'au fo'i lea mo tatou fanau, fiafia e tautua ma faia mea uma e vi'ia ai le Atua, aua ne'i galo ia mau pea o tatou loto i le Ali'i e manuia ai mea uma.

GALUEGA FA'ATINO: Manaia fo'i ae aumai le upu TAUTUA, e fa'asoa ai ma fa'amalamalama uiga eseese o le tautua.

A'OA'OGA: Fa'asoa pea i le tele o a'oa'oga eseese e tataua ona maua mai le tala, nisi ia o a'oa'oga e fa'asoa ai pea fanau.

1. Taua pea le fa'alogu ma usita'i i le fa'asino folau a le Atua.
2. Taua le alofa o le tasi i le tasi, auā o le Atua o le alofa lava lea.
3. O le ola tautua e mau pea le loto i le Atua.
4. O le maliu o Keriso o le alofa lava lea o le Atua i le lalolagi.

PESE: Olioli i le Ali'i o lo'u malosi lea....

TATALO: ‘Ua uma la matou fa’asoa i le matagofie o le mataupu, tatalo lava ia fesoasoani lou Agaga i loto e fa’amalamalama atili au afioga uma. Fa’amagalo i matou uma ma ia tatou mafuta i lenei aso ma ona tapua’iga. Ona o Iesu. Amene.

Manuia le alo atu i tapua’iga o lenei Aso Sa.

.....

ASO SA - AUKUSO 23, 2026

MATAUPU: “TALOSAGA MO MEAALOFA O LE POTO.”(Asking for the gift of wisdom)

TUSI FAITAU: 2 NOFOAIGA TUPU 1: 7-12

SINI: Ia manino fanau o le Atua, e na te aumaia le poto pe afai tatou te fa’alogo iā te ia.

FESOASOANI MO LE FAIAOGA: Malo le soifua manuia i lau Susuga a le faiaoga, tatou maua lenei taeao i le alofa fa’asoa o le Atua. O le fa’amanatu masani lava ina ia lava se taimi e sailiili ai, auā nisi manatu e fa’aopoopo i le fa’asoa. Taua lava le su’esu’e i le Tusi Paia o le atoa lenā o le tatou mataupu. Manuia le fa’asoa i fanau.

FESOASOANI MO LE MATAUPU: O ai ea sē fia maua le poto? Ou te taofi o i tatou uma lava, auā e mana’omia lea va’aiga pe ā fua i le tatou tala na faitauina. Ua tula’i mai Solomona e fai ma tupu o Isaraelu, ua sui tulaga i lona tamā o Tavita. O le mea lava lea na ia manatu ai e momoli taulaga i le Atua, o taulaga mū e afe na ia saunia na fai ma ala na fa’aali ane ai le Atua iā te ia i le po, ma fesili; “Ia e fai mai se mea ou te avatu ai iā te oe.” Ua iloa e Solomona le alofa naunauta’i o le Atua i lona tamā o Tavita ma tofia e sui tulaga i le avea ma tupu mo le nu’u e to’atele. Na ia lē manatu i se isi a mea o le olaga, a’o lona mana’o ia foa’i mai le poto ma le atamai ina ia feālua’i ai i luma o le nu’u, auā o ai ea sē na te mafaia ona ia fa’amasinoina lou nu’u ua to’atele. Ua finagalo le Atua e talia le mea na mana’o ai Solomona, ona ua ia manatu e le o ole i ni oloa po’o se tamaoaiga, po’o ē ua ita iā te ia atoa ma le ola tululu’i. A’o ia ua ole i le poto ma le atamai e fa’amasinoina ai le nu’u. O le mea fo’i lea na finagalo ai le Atua e avea ma tupu ma ia foa’i iai le oloa ma le tamāoaiga ma le mamalu, e le’i fa’apea ona iai i tupu na muamua ia Solomona, e lē fa’apea fo’i i ē mulimuli iā te oe. Manaia fo’i lea manatu iā i tatou fanau, tatou finau pea ina ia maua le poto ma le atamai, aua ne’i galo, le tatalo pea i le Atua e foa’i mai lea poto ina ia tatou maua. Soia le manatu i le poto fa’ale-lalolagi, auā e leai se tatou mea e maua ai, le poto lenā lea e fa’i mai ai nisi o poto moto. Tatou saili le poto moni mai le Atua e manuia ai.

GALUEGA FA’ATINO: Manaia tele ae fa’asoa i le uiga o le upu; “POTO” Vaelua le vasega ma talanoa i nei ona aso ma suiga o fanau po’o naunau i lenei mea taua pe leai fo’i.

A’OA’OGA: Tele ia o a’oa’oga o le tala ma e tataua lava ona fa’asoa fa’atasi.

1. A maua le poto ona tatou iloa lea ola tataua i lenei lalolagi.
2. E leai se tasi e aumai ai le poto, ua na’o le Atua lava.
3. Taua fo’i le fa’alogo i matua auā e alofa mai ai le Atua iā i tatou.

PESE: O le poto e taua.....

TATALO: Ua ma'ea la matou mataupu fa'asoa, fesoasoani mai e fa'amalamalama iā te'i matou. Fa'amagalo i matou i mea ua sesē ai, ma mafuta mai i lenei aso ma fuafuaga uma. Ona o Iesu. Amene!

MANUIA LE ASO SA.

.....

ASO SA -- AUKUSO 30, 2026

MATAUPU FA'AMANATU O LE MASINA AOKUSO

FESOASOANI MO LE FAIAOGA: O lo'o i lau Susuga lava le avanoa e fai ai le fa'amanatu o lenei masina, o lo'o iai pea le avanoa tatala e fai ai le su'ega o mataupu uma na a'oa'oina. O nai fesili ma tali na e fa'aopoopo i lau tapenaga. Manuia le fa'amanatu

1. Fesili: Aisea ua faatusa ai e Iesu i tamaiti le ua sili I le malo o le Atua?

Tali: Auā o i latou ia e mamā i le malō o le lagi.

2. Fesili: O le ā fo'i le saunoaga a Iesu i lona 'au so'o e uiga i tamaiti?

Tali: A lē fa'apei outou o tamaiti tou te lē sao i le malō o le lagi.

3. O le ā fo'i le mea na fefinaua'i ai le 'au so'o?

Tali: Ua finau i le sili, ua manatu po'o ai e sili.

4. O le ā fo'i le mea lea e manatu iai Iesu ia maua e le 'au so'o?

Tali: O le loto maulalo.

5. O le ā le taimi na vala'auina ai Ieremia e fai ma perofeta?

Tali: Na vala'au iai le Atua a'o i totonu o le manava o lona tinā.

6. O le ā le tala a Ieremia na fai i le Atua ina ua vala'auina e fai ma perofeta?

Tali: Ou te leiloa tautala, ua na'o a'u o se tamaitiiti.

7. O le ā fo'i le fetalaiga a le Atua na fai atu iā Ieremia?

Tali: 'Aua e te fefe, iā te'i latou, auā ou te iā te oe ma lavea'i iā te oe.

8. O le ā se mea taua ua iloa e Ieremia ua aumai e le Atua?

Tali: Pule aoao le Atua i mea uma.

9. O le a le mea na alaga ai Peteru i lona vaitaimi?

Tali: O le maliu o Iesu ia fa'amalosia pea i lotu.

10. O le ā le fa'amalosi mo tagata ia e talanoa iai Peteru?

Tali: Ia ola tautua ma lotu mau pea i le Atua e tatou te maua ai le ola.

11. O le ā le feso'ota'iga a le tagata ma le Atua ina ua tatou vaivai i le ola?

Tali: O le tatalo lava.

12. O le ā le mea na ole ai Solomona i le Atua?

Tali: Ia foa'i mai le mafau'fau matala e fa'amasino ai le nu'u.

13. O ai na soso'o ma le tupu o Tavita i le nofoa'iga?

Tali: O lona atali'i o Solomona.

14. O le ā se mea e tutusa ai tatou ma Solomona?

Tali: Tatou te fia maua le poto, mafua'aga lenā e tatou te o ai i le a'oga.

15. Aisea na naunau ai Solomona i le poto mai le Atua?

Tali: Ina ua to'atele tele le nu'u ma lē talitonu i le Atua.

Manuia tele lenei Aso Sa.

ASO SA - SETEMA 06, 2026 "ASO SA O LE TALALELEI."

MATAUPU: "O AI TATOU TE TALITONU IAI." (Who do we trust)

TUSI FAITAU: ISAIA - 36: 13-20

SINI: Ia iloa e fanau o le talitonuga o le tagata ua na o le Atua lava.

FESOASOANI MO LE FAIAOGA: Malo galulue fa'afetai le fa'amalosi i tiute fa'aauau o lenei taeao. Ia tautuanā lava ia faitau pea le Tusi Paia e maua ai manatu e fesoasoani ai i lau fa'asoa. E taua fo'i le malamalama o fanau i le faitauga ma malamalama i uiga o upu o lo'o faitauina. Manuia tele le fa'asoa.

FESOASOANI MO LE MATAUPU: Tatou taunu'u i lenei taeao, a'o le taeao e manatua pea auā o le taeao o le Talalelei, tatou mafau'fau pea iai i lona o'o mai i lenei aso. O le mea fo'i lea ua aumaia ai e Isaia le tala i le fe'au a Sanerivi le tupu o Asuria iā Esekia. Le vaitau o le nofo pologa o le nu'u o le Atua i nu'u ese, a'o le vaega lea na faitauina o le tala, o le taumafai o isi ta'ita'i e talanoa atu iā Ravesaki, ina ia talanoa atu i auauna i le gagana a Arama ina ia lagona e i latou, ae aua ne'i talanoa atu i le gagana a Iuta auā e lagona e tagata o lo'o fa'alologologo mai. O upu na tali atu ai e iloa ai lona fa'amaualuga, e fa'atuatua i atua ese, e le manatu i le Atua e ou le mana uma lava. O lea ua fai atu ai ma le leo tele i le gagana a Iuta; "Fa'alologologo maia ia i le afioga a le tupu silisili, o le tupu o Asuria." O lea ua alaga lava; "Aua ne'i 'olegia outou e Esekia, auā na te lē mafaia ona lavea'i iā te outou." O fefinaua'iga i le va o Ravesaki ma Esekia, ua latou manatu e soia le toe manatu iā Esekia auā e le fa'asaoia ai i latou e lona Atua. Ua latou naunau i o latou atua e fausia lava e i latou, o latou atua fo'i e maua ai lo latou lelei atoatoa. Peita'i, o le taologologo a Esekia, o le Atua o ia e tatau ona latou talitonu iai, auā o ia e fafagaina i latou i le manuia o le Atua e o'o i le fa'avavau. Ua latou manatu e pepelo mea ia ua tautala atu ai Esekia, o lona lava manatu o lona Atua, a'o le i'uga na toe omai lava i latou ia o Eliakimo, ma Sevena atoa ma Ioa'a, ua omai iā Esekia ma o latou ofu ua saei, ua latou tala mai iā te ia o upu a Ravesaki. Ioe, o le Atua lava e tatau ona tatou talitonu iai, tatou fa'atuatua pea o Ia lava e tatou te maua ai manuia ma le ola atali.

GALUEGA FA'ATINO: Tatou talanoa i gagana e pei ona aumai i le tala, po'o le ā se mea e tupu pe afai e talanoa isi i nisi gagana e lē malamalama ai tatou. O le ā so tatou taofi i lea mea?

A’OA’OGA: Nisi ia o a’oa’oga e fa’atatau i le tala e fa’asoa ai fo’i lau Susuga ma fanau.

1. Aua nei fa’asesēina i tatou i atua o nu’u ese, a ia tatou talitonu pea i lo tatou Atua.
2. O le atua o Asuria o atua na fausia e tagata ina ia sesē ai la latou fa’ataua.
3. Mulimuli pea i le Atua o Esekia, le Atua pule aoao e ou le mana ma le malosī uma lava.
4. Aua le alu i ta’a’iga e lē maua ai se mea lelei, ae fa’amoemoe i le Atua e ola ai.

PESE: Pese ma Viiga)Pese 181

TATALO: Fa’amalamalama mai pea lou Agaga i ō matou loto e ala i la matou fa’asoa. Fa’amagalo i matou uma ma fa’atasi mai i le sauniga faitele i lau Afio. Ona o Iesu. Amene.

Manuia malologa o le Aso Sa.

.....

ASO SA - SETEMA 13, 2026

MATAUPU: “O LE PULE A AI? (By what authority)

TUSI FAITAU: MATAIO 21: 23-27

SINI; O Iesu o le Ulu ia o le Ekalesia, o Ia fo’i e ana le Pule uma lava.

FESOASOANI MO LE FAIAOGA: Ua tatou taunu’u fo’i i lenei aso paia, ua maua fo’i le taeao manuia i lau Susuga a le faiaoga. Taua lava le fa’amanatu masani ina ia lava pea se taimi auā le su’esu’eina o le tusi faitau atoa ai ma le fa’asoa atu. Ia maua pea le Agaga o le Atua e ta’ita’iina ai lau Susuga ma le fa’asoa atu i fanau. Manuia tele le fa’asoa.

FESOASOANI MO LE FA’ASOA: O lea lava e fa’asolo vavega ma a’oa’oga a le Ali’i o Iesu, e pei fo’i ona aumaia e le tala ua o’o o ia i Ierusalem ma faia ai fa’ataoto e tele. A silasila lelei i le mataupu lea e 21, ua o’o i Ierusalem ma ulufale i le malumalu, o iinei na tulia uma ai i fafo ē na fefa’ataua’i oloa i totonu ma fuli laulau a ē na sui tupe ma nofoa a ē na fa’atau lupe. Soso’o mai ai ma le fetu’uina o le mati, ua mago ma lē toe ola mai. O ia va’aiga eseese na fesiligia ai e tagata le Pule a Iesu, ua ulufale o Ia i le malumalu, a’o faia ana a’oa’oga, ua manatu le ‘au toaina o le nu’u ma ositaulaga sili e tu’u fesilisili pea i le Ali’i. “O le pule a ai e te fai ai na mea?” “O ai fo’i na tu’uina atu iā te oe lenā Pule?” O le fesili a le vaega lea na toe fesiligia ai fo’i e Iesu latou, Ua fesili Iesu i le galuega a Ioane na papatisoina ai o Ia. Pe mai le lagi pe mai tagata? Ua faigata ona latou tali auā ua manino i latou i le tali o le a tu’uiona mai e Iesu, ua tele mea e popole iai i latou pe ā tali sa’o atu i le fetalaiga a le Ali’i. O le mea lea na latou tali ai; “Matou te leiloa” O iinei na tali atu ai Iesu; “Ou te le ta’u atu fo’i iā te outou le Pule ou te faia ai nei mea.” Ua tatou manino fanau o le Pule a o le Pule, e lē o’o iai le malosī o se tagata ua na’o le Atua lava. Aua nei galo fanau, o le Pule tonu ma le Pule sili o le Atua lava lea e pei ona fetalai mai ai lo tatou Ali’i o Iesu. O le taua fo’i lea mo i tatou uma fanau pe afai e tatou te maua pea le loto atu i le Ali’i auā o ia o le Pule aoao.

GALUEGA FA’ATINO: Taua le fa’asoa pea i le upu; “PULE” po’o le ā sona taua i le ola lenei a’o le ā fo’i se va’aiga e iloa ai le tulaga pule fa’ale- lalolagi po’o atagia ai le fesoasoani mai o le Atua i lea pule. O le pule tonu ā e tataua ona pulea mai e le Atua ona manuia lea o fa’aiuga uma.

A’OA’OGA: Tele pea a’oa’oga e maua mai le tala e fa’asoa ai ma fanau, a’o nisi nei o a’oa’oga e fa’aioa atu pea.

1. Soia le fia pule a'e fa'alagolago pea i le pule aoao a le Atua i mea uma.
2. Aua le faia le fale o le Ali'i ma fale e pule ai le tagata ma ana mea e fai.
3. E tupu ā le lavea o le fesili fua i le mea e lē o'o iai lo tatou malosi.
4. Aua le sopolagi le pule, auā na'o le Atua e pule i mea uma lava.

PESE: Pese ma Viiga (Pese 180)

TATALO: Fa'afetai mo lau pule le Atua, matou fa'asoa ai i lenei taeao ma ua manino o Oe lava le pule aoao. Fa'amagalo i matou ma fesoasoani mai e fa'amatala pea au afioga i ō matou loto. Ona o Iesu. Amene.

Manuia le alo atu i tapua'ia faitele o lenei Aso Sa.

ASO SA - SETEMA 20, 2026

MATAUPU: "TULAFONO MO LE AIGA." (Rules for the family)

TUSI FAITAU: ESOTO 21: 2-11

SINI: O le ola i Tulafono e manuia ai aiga.

FESOASOANI MO LE FAIAOGA: Ua fa'amalō taupati ua tatou taunu'u lava i lenei taeao fou, malo le usu iā outou Susuga a faiaoga. Ia manatua lava le tauā o lau pitola'au, ma ia lava pea se taimi e su'esu'e atili ai i la tatou mataupu. E lelei lava le fa'amasani o fanau e faitau le Tusi Paia ma malamalama atili i uiga o upu ua faitauina. Manuia tele le fa'asoa i le mataupu.

FESOASOANI MO LE MATAUPU: Ua manino tala o le Esoto, tala o le o ese o le nu'u o le Atua mai Aikupito i lalo o le ta'iat'iga a Mose. Fa'atoā uma lava ona tu'uina mai e le Atua tulafono iā Mose e tatau ona savavali ai le nu'u. A'o le mataupu ua faitauina mai le Esoto e 21, "O Tulafono i 'Au'auna" lea ua fa'amatalatala uiga o tulafono na aumai e le Atua e ola ma savavali ai le nu'u. Ua talanoa i ta'iala mo le aiga, taua lea manatu auā a sologa manuia aiga ma lelei lona fa'atinoina, e mautinoa o le aiga lenā e mafuta ai Iesu. O tulafono e tatau ona faia e aiga auā o tulafono mai le Atua e tatau ona mulimulita'i iai. Fai mai a fa'atau se 'au'auna Eperu, e 'au'auna ia te oe i tausaga e ono, a'o le fitu o tausaga, e te fa'asa'oloto ai. Afai fo'i na sau to'atasi na'o ia, e tatau ona fo'i to'atasi ai, afai e faia sana avā, ia ō i la'ua ma le to'alua. Ae afai e avane e lona matai se avā mo ia, ia pule le matai auā e tu'u uma lava i le matai le fanau ma le avā ae alu to'atasi lava na'o ia. A fete'ena'i ma le matai ona molia lea e le matai i fa'amasino, e ta'ita'iina fo'i e ia i le puipui, po'o le pou o le faitoto'a; ona tui ai lea e lona matai i lona taliga i le aū, ona 'au'auna pea lea o ia iā te ia. O tiala ia mo le aiga, e pule le matai i ona manatu e pei ona aumaia e le tatou faitauga. O le ata fo'i lea e tatau ona tatou usita'i ai auā o tulafono mai le Atua, o le manatu fo'i lea o Mose e tatau ona tausisi pea iai. Taua fo'i lea mo tatou le fanau le ola usiusita'i i matua. Tatou fa'alogi e pei o Isaraelu na fa'alogi i tulafono a le Atua. Taua aiga auā o le aiga o le fu'a laualuga lea o lo tatou ola e fa'amuumua i mea uma tatou te taumafai iai.

GALUEGA FA'ATINO: Manaia fo'i 'ae fa'amanatu pea tulafono na tu'uina mai e le Atua tatou te ola ai, auā o le Atua na faia mea uma lava. Fa'asoa pea i le taua e fa'amanatu ai le alofa o le Atua.....

A'OA'OGA: Nai a'oa'oga ia e fesoasoani i fanau, auā le tatou mataupu.

1. O le usita'i i tulafono e manuia ai ma maua ai mea e tele o lenei olaga.
2. Aua tatou te fa'atamata i le tulafono na tu'uina mai e le Atua.
3. So'o se tagata lava e usita'i i tulafono e fiafia fo'i ia i le Atua.
4. Tautuanā o tatou aiga ia ta'iala lelei ma mafuta pea i le fa'asinoga a le Atua.

PESE: Pese ma Viiga. (Pese 325)

TATALO: Fa'afetai tele le Atua mo la matou fa'asoa, aumai lou Agaga e ta'ita'iina ai i matou i lenei aso paia. Fa'amagalo lo matou vaivai ma fa'aatoa la matou fa'alogo i lou fetalai mai e ala i la matou tapua'iga. E ala iā Iesu. Amene.

Manuia tele le Aso Sa.

ASO SA—SETEMA 27, 2026

MATAUPU FA'AMANATU O SETEMA

UA TATOU TAUNU'U I LE ASO O LA TATOU FA'AMANATU, TU'U ATU PEA LE AVANOA IĀ OUTOU SUSUGA MO LE FAIGA O LA TATOU SU'EGA. O NAI FESILI IA E FESOASOANI PEA I LE MATAUPU FA'AMANATU.

1. O le ā se mea e taua ai lenei Aso Sa o le Talalelei i le tatou tala fa'asolopito?

Tali: O le taeao o le talalelei, taeao na susulu mai ai le malamalama i laufanua o Samoa.

2. O ai lea e momolia le fea'u mo Iuta ia fa'atuatua pea i le Atua?

Tali: O Kuresa.

3. A'o ai lea na le talitonu ma fai atu iā Esekia?

Tali: O Ravesaki.

4. O ai fo'i lea na taumafai e upu esea Kuresa ma lona manatu?

Tali; O Eliakimo, Seneva ma Ioa'a.

5. O le ā le tala a Ravesaki na fai atu iā Kuresa?

Tali: Aua ne'i olegia outou e Esekia, auā na te lē mafaia ona lavea'i iā te outou.

6. O le Pule a ai lea e talanoa ai le tala sa tatou aoaoina?

Tali: Pule a Iesu.

7. O le ā le mea na faia e Iesu i le 'au fa'atau 'oa i totonu o le falesa?

Tali: Fuli i lalo laulau sa fa'atau ai a latou oloa.

8. O le ā le saunoaga a Iesu na fai iā te'i latou na fa'atau 'oa?

Tali: 'Aua tou te faia le fale o lo'u Tamā ma fale e fa'atau ai a outou oloa.

9. O le ā le manatu o le vaega na fa'atau'oa i le Pule a Iesu?

Tali: "O le Pule a ai ua e faia ai nā mea" "O ai fo'i na tu'uina atu lenā pule iā te oe?"

10. O le ā le fesili a Iesu na manino ai nei tagata?

Tali: “Ou te le ta’uina atu fo’i iā te outou le Pule ou te faia ai nei mea.”

11. O le ā le mea na tu’uina e le Atua ia Mose ina ia ola ai tagata?

Tali: O talafono.

12. O le ā fo’i le uiga o le tusi o Esoto?

Tali: O le o ese mai. (Aikupito)

13. O le ā le mea e tatau ona faia i le ta’ialaina o ō tatou aiga?

Tali: Tatau fo’i ona tatou mulimuli pea i tulafono fa’ale - aiga e manuia ai.

14. O ai na fai ma ta’ita’i o le fanauga a Israelu i le taimi o le Esoto?

Tali: O Mose.

MANUIA LE TAPUAIGA

ASO SA—OKETOPA 04,2026-----OKETOPA 25, 2026

MALOLOGA O LE LOTU A TAMAITI

MANUIA TELE LO OUTOU ASO FA’APITOA FANAU

ASO SA - NOVEMA 01, 2026

MATAUPU: “O LE TAULAGA OLA” (Living Sacrifice)

TUSI FAITAU: ROMA 12: 1-8

SINI: Ia malamalama fanau o taulaga tatou te tu’uina atu i le Atua, o taulaga ola ia.

FESOASONI MO LE FAIAOGA: Ua malō le pale, fa’amalō le usu i lā tatou a’oga Aso Sa, fa’amalō fo’i le manatu alofa i fanau a le Ekalesia. O le fa’amanatu masani lava, ina ia maua pea se taimi e su’esu’e ai i la tatou mataupu. Po’o fea lava e aga iai manatu ia tausisi lava i le Tusi faitau e maua ai se atoa o le fa’asoa. Manuia le fa’asoa atu i fanau.

FESOASOANI MO LE MATAUPU: O ā lava mea tatou te faia, ia faia lava ma le fa’amoemoe i le Atua. Ou te taofi o le manatu lava lea o le Aposetolo na ia tusi atu ai i le Ekalesia i Roma, e ui lava i sona naunau e fia tūvae i Roma ae sa leai se avanoa mo ia e o’o atu ai i le Ekalesia. O le mea lava lea na ia tusi atu ai, ma ia fa’ataoto le mataupu silisili, ma lona naunau; “O le ‘aio’i atu a Paulo i le Ekalesia ia lelei a latou amio.” Ia ola e tusa ma le alofa mutimutivale o le Atua, ma ia outou tu’uina atu ō outou tino i le Atua, o le taulaga ola, ma le pa’ia, ma le mālīe, o le mea lea e tatau ona outou faia. Soia le amio fa’atasi ma lenei lalolagi, a ia toe fuata’ina o outou loto ma ia su’esu’e pea pe se ā le finagalo o le Atua mo tatou tagata. O le alofa o le Atua na tu’uina mai iā Paulo e tusi atu ai, ina ia aua nei fa’asili se manatu, a ia mamā manatu, ma ia tusa ma le tofiga o le fa’atuatua pea i le Atua. Ua aumai ai e Paulo le ata o le tino, e fai ma ata fa’afa’atusa e tele itū tino, ae tasi lava le tino atoa. Ua ia manatu e tino e tasi i tatou iā Keriso, ina ia tasi ai le tino atoa, ua ia ta’u atu e eseese o tatou faiva, ua tufaina

mai e lō tatou tamā oi le lagi. Afai o le perofeta ia faia le tofi o le fa'atua, po'o le tiakono ia galue o le tofi tiakono, po'o le a'oa'o, ia a'oa'o atu ia, po'o le apoapoa'i, ia apoapoa'i o ia. O le fo'ai atu, ia matamau e fo'ai atu, o lē pule ia filigā, o le faia meaalofa, ia faia ma le loto fiafia. O mea uma ia na tusi atu ai le Aposetolo, ia faia e le Ekalesia e atagia ai le taulaga ola, ina ia fiafia iai. Ia maua lava le loto atu i le Atua ma maua le loto maulalo, e mulimuli ai i mea o le ola e atagia ai le alofa i le Atua. O avanoa fa'asoa e tu'uina mo le Ekalesia i Roma, a'o se fa'amalosi fo'i lea mo tatou fanau ma le lē faigofie o nei aso ua tatou iai. Tumau pea i le Atua, e manuia ai ma mulimuli i ona ala uma.

GALUEGA FA'ATINO: O le ā se va'aiga i nei aso ma le Talalelei fa'aauau, o tutusa ma le tusi atu o le Aposetolo i le Ekalesia i Roma? (Ekalesia i Roma--- Ekalesia i aso nei) Taua lava le fa'asoa pea iai.

A'OA'OGA: O nisi ia o a'oa'oga e fa'asoa ai mo le tala 'ua fa'amatalaina.

1. O le taulaga ola o le taulaga e fa'amuamua ai le Atua.
2. Aua le tau ma sui, a ia tutusa uma tagata i lau faitau.
3. Ia faia mea uma ma le loto maulalo.
4. Ia tumau i fa'asinomaga a le Agaga, e manuia ai.

PESE: Pese ma Viiga. (Pese 158)

TATALO: Fesoasoani mai pea lou Agaga e ta'ita'ina i matou ina ia matou manino i lou fetalai mai. Fa'amagalo i matou ma fa'atasi mai e ala i lā matou sauniga. Ona o Iesu. Amene.

MANUIA TELE LE ASO SA.

.....

ASO SA - NOVEMA 08, 2026

MATAUPU: "GALUEGA TALA'IAPAULO I NU'U ESE." (Paul's ministry to the Gentiles.)

TUSI FAITAU: ROMA 15 : 14-21

SINI: Ia manino lava fanau i le Galuega a Paulo mo nu'u ese.

FESOASOANI MO LE FAIAOGA: Fa'afetaia pea le Atua i lana tausiga ma foa'i le ola mo lau Susuga a le faiaoga ma i tatou uma. Malō le pale i lenei taeao, o le fa'amanatu masani lava, ina ia maua pea se taimi e sailiili ai i la tatou mataupu. Ia maua pea le avanoa e faitau ai le tusi faitau ma maua ai nisi manatu e fesoasoani ai i le mataupu. Ia manuia tele le fa'asoa atu i fanau mo lenei Aso Sa.

FESOASOANI MO LE MATAUPU: Ua mavae atu fa'aletonu, ma mea tigā sa feagai ma Paulo a'o Saulo ia, lea ua toe afua se taeao fou, ina ua ia momo'e punoua'i i le lumana'i. O lona loto malosi e tala'i le talalelei i nu'u ese, auā o ia o le matua o faiva o le talalelei mo nu'u ese. O le tatou faitauga o lo'o aumai ai lona loto malosi, e lē o se malosi i se isi ā mea, a'o lona malosi e tala'i atu le tala iā Iesu i nu'u e lē o o'o iai le talalelei. O nisi fo'i nu'u sa ia totō ai le fatu o le talalelei; peita'i ua fa'ale-ilogā lona tula'i mai. Lea lā ua ia maua pea le malosi e tala'i atu ai, e pei fo'i o lana tusi atu i Roma, le Ekalesia sa naunau e fia o'o iai, a'o lea ua ia tusi atu lava ma lona fa'amoemoe e fia o'o atu a'o aga atu e tala'i le talalelei i Sepania ma isi nu'u ese o lo'o malosi ai tala'iga a Iutaia. O ana upu e iloa ai; O'u uso e, ua'ou mautinoa, o a'u nei lava, ua tūtūmu outou fo'i i le agalelei, ua apepele i le poto uma lava, ua outou mafaia fo'i ona

apoapoa'i le tasi i le tasi. O lana fa'amalosi atu na ia tusi ai ona o le alofa tunoa o Keriso na foa'iina atu ai iā te ia e le Atua le malosi ma le mana uma lava e tala'i atu ai ma auauna atu iā Iesu Keriso i nu'u ese. O lea ua ia manatu e fai le faiva o le osi taulaga i le talalelei a le Atua, ina ia talileleia le taulaga a nu'u ese, ma fa'apa'iaina e le Agaga Paia. O le amio lea e naunau ai Paulo mo nu'u ese, ia iai le mana o le Agaga e fiafia ai e tala'i atu le talalelei i nu'u ese. O le mea fo'i lea e tataua ona tatou faia fanau ina ia tala'i atu le talalelei e le gata iā i tatou a'o isi tagata ua fa'aseseina i le tele o mea lē aogā ua lolofi mai i lenei vaitau. Tala'i pea ma le loto, ma maua'a i le Atua e manuia ai.

GALUEGA FA'ATINO: Fa'auma mai le fuaiupu lea i upu o lo'o misi; "E, i o ē na lē i ai le 'iā te ia, e e i o ē na lē atu iai." (Vaai le faitauga o lo'o iai le atoa o le fuaiupu lea.)

A'OA'OGA: Ia fesili pea i fanau po'o ā ni a'oa'oga ua maua mai le tala. A'o nisi ia o a'oa'oga e manatunatu pea iai.

1. Ia maua le loto toa e tala'i atu ai le talalelei iā Keriso.
2. E leai se mea faigatā i le ola nei pe ā fa'amuumua le Atua i mea uma.
3. Ia tala'i ma tumau ai, pe afai ua loto i le Atua.

PESE: Pese ma Viiga. (Pese 177)

TATALO: Ua ma'ea la matou mataupu, fa'ailoa mai pea lau Afio iā i matou mo lona fa'a malamalamaina. Fa'amagalo i matou ma auai mai i lenei tapuaiga. Ona o Iesu. Amene.

MANUIA TELE LENEI ASO SA.

ASO SA - NOVEMA 15, 2026

MATAUPU: "UA ATUA I LE 'OA" (The love of money.)

TUSI FAITAU: 1 TIMOTEO - 6: 6-11

SINI: Ia manino fanau ia gata lou mana'o i mea ua fo'ai e le Atua iā te oe.

FESOASOANI MO LE FAIAOGA: Ua tatou maua fiafia lenei taeao fo'u i le pule fa'asoa a le Atua. Malo le usu mo le fa'ataunu'uina o lā tatou Aoga Aso Sa, ia iai pea le fesoasoani mai o le Agaga e fa'amatala la tatou mataupu. O le fa'amanatu masani lava ia iai pea se avanoa e su'esu'e ai i le tusi faitau e maua ai nisi manatu e fesoasoani ai i le fa'amatalaina o le fa'asoa mo fanau. Manuia tele le fa'asoa atu.

FESOASOANI MO LE MATAUPU: Taua le 'oa ma le tamao'aiga auā e tua iai lo tatou ola i mea e fai, a'o lea ua tusi atu Paulo i lona atali'i fa'ale-agaga o Timoteo, o lana fa'amalosi ia tumau i le fa'atuatua ma le alofa tunoa o Keriso, ma le manuia mai le Atua. O lona taumafai e u'una'i pea lona atali'i ia fa'amalosi i le galuega, le galuega e tele faigatā o le a fetaia'i, tele fa'aosoosoga eseese e fai ma fa'afitauli mo le tala'iga. O le manatu o Paulo ia fa'amalosi atu ia Timoteo, ia loto tele ma taumafai e tete'e atu i a'oa'oga sesē o lo'o fa'asagatau mai i a'oa'oga moni, lea ua salalau i totonu o Efeso. Ua manatu fo'i e filifilia nisi o tagata Efeso e fai ma ona fesoasoani i lana galuega tala'i. O le tatou faitauga o lo'o taoto i le fuaiupu e 6 e o'o i le 11 o lo'o fa'a'auaina i a'oa'oga sesē ma le 'oa, o lo'o mamapo tagata i 'oa fa'ale-lalolagi, o a'oa'oga ia e matuā sesē e pei ona aumaia e Timoteo. O lona manatu ia gaua'i i upu e ola ai, ia

pei o le 'oa e maua mai lo tatou Ali'i o Iesu Keriso. O lea ua fa'amalosi mai Timoteo o le 'oa e tele, o le amio Atua ma le loto mālīe, Auā o lona manatu na ō tatou omai gaogao i le lalolagi, leai ā se mea e tasi na tatou aumaia. O lea e foa'i mai e le Atua, mea e ai, ma vai e inu, atoa ma mea tatou te o'ofu ai, o le foa'i a le Atua. Lona uiga ia gata le mana'o i mea ua foa'iina mai. O le mana'o i le fia mau'oa e fa'asesēina lava ia, atoa ma ē e manana'o i tupe, o le pogai lea o mea leaga uma lava ma tatou pau'ū atu ai i le agasala, ma ua maua ai i tatou i puapuaga e tele. Manaia upu o lo'o fa'ai'u iai le faitauga, (fuaiupu e 11) "A o oe, le tagata o le Atua e, ia e sola ese i ia mea; a ia e tausisi atu i le amiotonu, ma le amio Atua, ma le fa'atuatua, ma le alofa, ma le onosa'i, ma le agamalū." O mea uma nei e tataua ona tatou manatu mamafa iai, ina ia tatou avea ma so'o e tala'i atu le Keriso toetū. Fanau, so'ia le mana'o tele ae gata lo tatou manana'o i mea ua foa'i mai e le Atua iā i tatou.

GALUEGA FA'ATINO: Tatou fa'asoa i le 'oa fa'ale-lalolagi ma le 'oa fa'ale-lagi. O fea o ia 'oa e tataua ona ave iai la tatou fa'amamafa? (Manaia le fa'asoa ma tufa i ō outou lava manatu)

A'OA'OGA: O nai a'oa'oga mo la tatou mataupu e fesoasoani pea i le fa'asoa a fanau.

1. Aua le mana'o tele.
2. Fua lou mana'o i mea ua e maua.
3. O le tamaoaiga o le fa'asoa alofa lenā a le Atua i le tagata.
4. Ia fa'atau Iesu i lou mana'o e te lē mativa ai.

PESE: Pese ma Viiga. (Pese 222)

TATALO: Fa'amalō fa'afetai le Atua i lou mafutaina o i matou, e ala i la matou mataupu. Fesoasoani mai ma fa'amagalo i matou i mea ua matou sesē ai. Ona o Iesu. Amene.

MANUIA TELE LE ASO SA.

.....

ASO SA - NOVEMA 22, 2026.

MATAUPU: "POGISA MA LE MALAMALAMA." (Darkness and light)

TUSI FAITAU: 1 TESALONIA 4 : 13/ 5: 11

SINI: Ia manino fanau o le Pogisa e leai se mea e maua ai, a'o le malamalama e maua ai le ola, pei fo'i o Iesu o le malamalama lava ia.

FESOASOANI MO LE FAIAOGA: Malo le tauata'i i lenei taeao paia, malō le alofa i fanau ua mafua ai le fiafia e auai. Tautuanā pea le tapenaga ina ia atoa ma maua pea se taimi e sailiili ai i le Tusi Paia. O nai fesoasoani na ma se vaivai o le auauna e fesoasoani pea i lau tapenaga. Manuia tele le fa'asoa i fanau.

FESOASOANI MO LE MATAUPU: O le faitauga o lā tatou mataupu e pei ona aumaia e le tusi faitau, ua aumai ai le naunau o Paulo e toe fia asiasi atu i le Ekalesia i Tesalonia. O lo'o aumai ai lona loto atu i le 'au pa'ia uma oi Tesalonia, lea lā ua aumai ai le mataupu i ē o momoe, (o le oti) ina ne'i outou fa'anoanoa e pei o nisi e leai se fa'amoemoe. Ua aumai e Paulo le Iesu toetu, afai na maliu Keriso ma toetū mai, e fa'apea fo'i ona naunau o ia, ina ia tumau pea le galulue ma fa'atalitali le toe afio mai o Iesu e ala i lona Agaga fesoasoani mai. O apoapoa'iga mo le 'au uso ina ia tumau pea lo latou fa'atuatua i le Ali'i. Ou te taofi lava a'u ia, o le leai o se ata va'aia e tusa ma le soifua auauna ma tautua, o le pogisa lena lea e taumafai le Aposetolo

e ta'u atu. Ina ia malamalama ma iloa ala o le Keriso toetū, ua latou manatu o le afio mai o le Ali'i e le'o manino ai le 'au paia. Auā o le afio mai o le malamalama fo'i lea e suluia ai le lalolagi uma. Ua latou manatu ua oti Iesu ua leai so latou toe manatu i le Iesu, ua maliu, ua uma e le toe iai se toetū. Peita'i, e lē o le manatu lenā o le Aposetolo, aua ua ia talitonu o Iesu ua toetū, ua ia sau e lavea'i le lalolagi agasala. O lo tatou fesoasoani sili lea mo le lalolagi o tagata, o le afio mai o le Ali'i, o le ata manino lava lea ua aumai mo le Ekalesia. E ui i faigatā ma le lē talitonu i le toetū o Iesu, ae fiafia pea le Aposetolo e finau ina ia tumau le loto i galuega e galulue ai ma fa'atino se auaunaga mo le Keriso toetū. O le fa'amalosi fo'i lea mo tatou uma fanau, tatou maua le malamalama e tala'i ai pea le toetū manumalo o Iesu, soia ia le naunau i le pogisa e lē iai se tatou mea e maua ai. Finau pea i le tatalo e tu'uina atu i le Atua e fesoasoani mai mo i tatou lana fanau.

GALUEGA FA'ATINO: Fa'auma mai le fuaiupu lea e i totonu o le faitauga; Matou te ina ia iloa, le e, e uiga i ē o, ina ne'i, pei o isi e so latou

A'OA'OGA: O nai a'oa'oga nei e fa'atatau i le tatou tala e fesoasoani i nisi a'oa'oga ua maua.

1. Aua tatou te naunau i le pogisa, auā e leai sa tatou mea e maua ai.
2. O le malamalama, o le taula pea o loto i le Atua e iloa ai ala e tataua ona savavali ai.
3. Ia tatou fiafia e tala'i le toetu mai o Iesu, o lō tatou ala lena i malō.
4. Ia pei i tatou o Paulo na naunau e fa'amalosi ma naunau i lana galuega tala'i.

PESE: Suau'u i lau lamepa ia mū pea....

TATALO: Mamalu maia lou Agaga e fa'amatala loto la matou mataupu, ia nofo i o matou loto. Fa'amagalo i matou ma fesoasoani mai e ala i lenei aso ma ona sauniga. Ona o Iesu. Amene.

Manuia tele le Aso Sa.

.....

ASO SA - NOVEMA 29, 2026

MATAUPU FA'AMANATU O NOVEMA.

O lo'o i lau Susuga lava le faitalia e fai ai se fa'amanatu mo fanau o lenei masina. O nai fesili ia e fesoasoani mo lau su'ega. Manuia tele le fa'amanatu.

1. O ai tatou te fa'amoemoe iai i mea uma tatou te faia?

Tali: O le Atua.

2. O le ā le mea lea e naunau Paulo ia faia e le Ekalesia i Roma?

Tali: O le ai'oi a Paulo ia lelei lā latou amio.

3. Aiseā ua talanoa ai Paulo i le tino?

Tali: E tele ona vaega ae tasi ā le tino, lona uiga ia galulue fa'atasi.

4. Aiseā ua manatu ai Paulo i le tāua o tofiga i le Ekalesia?

Tali: Ia galue le tagata e tusa ma ona tofiga, 'ae 'aua le fevaevaea'i.

5. O le ā fo'i le 'autu o lā tatou mataupu fa'asoa ia Novema 08, 2026?

Tali: Galuega tala'i a Paulo i nu'u ese.

6. O le ā le mea na fa'aaogā e Paulo e tala'i ai le talalelei?

Tali: O le malosī o lona loto ma fa'amoemoe i le Atua.

7. Aiseā nā tusi ai Paulo i le Ekalesia i Roma?

Tali: Na tusi ina ia tumau i le Atua ma mulimuli i ala ma lana fa'asinomaga.

8. Aiseā na lē o'o ai Paulo i Roma?

Tali: Na lē o'o auā o lea e aga atu i isi nu'u e tala'i ai le talalelei.

9. O ai fo'i Timoteo?

Tali: O le atali'i fa'a le agaga o Paulo.

10. O le ā le mea lea e talanoa ai Paulo iā Timoteo?

Tali: Ia fa'amalosī i le galuega, ia maua le 'oa mai le Atua, ae le'o le 'oa fa'ale-lalolagi.

11. O ā upu a Timoteo i tagata Efeso?

Tali: Ia gata le mana'o i mea ua foa'iina mai e le Atua iā te'i latou.

12. O le ā le mea e tupu i le tagata e fia mau'oa?

Tali: E fa'asesēina o ia ona o le mana'otele'

13. O le ā le mea ua tupu i tagata Tesalonia?

Tali: 'Ua nofonofo ma fa'atalitali, leai se galuega o toe faia.

14. O le ā lō latou manatu, ina ua maliu Iesu?

Tali: Ua manatu e lē toetū mai Iesu.

15. O le ā le pogisa lea e aumaia e le mataupu?

Tali: Tagata ua mamao loto ma le Ali'i toetu.

16. Ae a le malamalama?

Tali: Tagata talitonu ma fa'atuatua i lona toetū mai.

.....
ASO SA -TESEMA 06, 2026

MATAUPU: "LEOLEO MAMOE LELEI." (The good shepperd)

TUSI FAITAU - ESEKIELU - 34 : 20-31

SINI: O le leoleo mamoe lelei o Iesu lava lea e leoleo mai i lo tatou ola.

FESOASOANI MO LE FAIAOGA: I le sua fa manumalō o lo tatou Ali'i o Iesu Keriso le faiaoga sili, e fa'atalofa atu ai i lō outou mamalu. Talosia o lo'o tau fai tutusa i tatou uma i le manuia mai le Atua. Fa'afetai onosa'i i le fa'atinoina o tiute ma faiva e pei ona galulue ai. A'o

le taulogologo lava ina ia lava saunia pea lau Susuga a le faiaoga e ala i le su'esu'e ma faitau le tusi faitau mo le mataupu. Ia manuia le tapenaga.

FESOASOANI MO LE MATAUPU: Ua tatou iai i lenei Aso Sa ma tatou mafau i le tatou tala ua fa'amatalaina. Ua aumaia ai e Esekielu le tala i leoleo mamoe o Isaraelu, lea ua o'o atu lava le afioga a le Ali'i iā Esekielu se'i talanoa atu i ia leoleo mamoe ona o le tulaga ua o'o iai ā latou faiga. Ua ese la latou fa'amamamua, ua latou fafaga iā latou lava, leai se manatu i le leoleo mamoe ma ona tiute fai. A'o le vaega lea na faitauina o le tala o le "Leoleo Mamoe Lelei" Ua aumaia ai e Iesu le ata o le tausia lelei o mamoe, ua ia fa'apoto mai mamoe ua salalau solo, mai laueleele eseese, ma fagaina i latou i mauga o Isaraelu. O autafa o vaitafe ma maua mea uma e manana'o iai. E sauni lava e le leoleo mamoe mea uma ma mea latou te ta'o'oto ai, ma ola fiafia ai. "O le mea lea ua fetalai mai ai o le Ali'i le Atua, iā te'i latou, Fa'auta o a'u, o a'u lava ou te fa'amasino i manu pepeti ma manu pāe'e'e." Ua fa'amatala iai e le tusitala uiga va'aia o le avea ma leoleo mamoe lelei, ua fetalai fo'i i le osia lelei o le feagaiga e manuia ai, e tuliese manu fea'i latou te sātia le lafu. O aga fa'a-leoleo mamoe lelei lea ua fa'amatala au'ili'ili e le Ali'i, i leoleo o Isaraelu ina ia mataala ai ma faia e pei o lona finagalo. O mea na fetalai atu ai le Ali'i ua na fa'ailoa ai lona mamalu ma lona silisiliese e avea ai o ia ma o ia lava o le Ali'i le Atua. Manaia upu fa'ai'u o le faitauga; "O outou fo'i la'u lafu, o le lafu o la'u ta'aga, o tagata lava outou, o a'u fo'i o lo outou Atua, o lo'o fetalai mai ai le Ali'i le Atua." O le Ali'i, o lo'o tatou maua ai le atoatoa o le leoleo mamoe lelei, o mea uma na ia fetalai ai, o ala tonu ia e tatou te iloa o ia o le tatou Leoleo mamoe lelei. O le ata fo'i lea e tatau ona tatou mulimuli ai ma faia ai tatou ma so'o ina ia tatou maua lea Agaga, o le avea ma leoleo mamoe lelei.

GALUEGA FA'ATINO: Manaia fo'i ae fa'asoa i le upu; TA'AGA, lea e aumaia e le tala, po'o le ā se manatu iai o fanau. "**O le lafu o la'u ta'aga**" (O la'u fa'asoa vaivai, o le ta'aga o le lafu mamoe e tata'a fa'atasi i totonu o le pa, lona uiga o le pa e fa'amoemoe e aumai le lafu ma tata'a fa'atasi ai). O le ata e atagia ai le alofa o le leoleo mamoe (Iesu) i ana mamoe ia malu ma puipuia lelei i lalo ona a'ao alofa.

A'O'A'OGA: O nai a'oa'oga nā e fesoasoani pea i lā tatou mataupu.

1. O le Ali'i o le leoleo mamoe lelei.
2. Aua le tu'ulafoa'iina mamoe, saili ma aumai i totonu o le lafu.
3. E tūa le mulimuli pea i le fa'atonuga a le leoleo mamoe.
4. A leai le Atua e lē anoa fo'i le avea ma leoleo mamoe.

PESE: Le leoleo mamoe lelei.....

TATALO: Fesoasoani mai pea lau afio i le fa'amalamalamaina o lā matou fa'asoa. Fa'amagalo i matou ma auai mai i lenei aso ma ona sauniga uma. E ala iā Iesu. Amene.

Manuia tele lenei Aso Sa.

.....

ASO SA--- TESEMA 13, 2026

MATAUPU FA'AMANATU O TESEMA

Ua tatou taunu'u i lā tatou mataupu mulimuli o lenei tausaga, e iai lava le manatu e fa'aauau pea sa tatou fa'amanatu. Taua fo'i lea mo la tatou faigamalaga toe o se aga tatou taunu'u i le Kerisimasi ma le Tausaga Fou. Tatou fa'atalitali pea i le Pepe o le Kerisimasi, ma ia maua pea le agaga e talitonu ma fa'atuatua pea iā te Ia. Talu ai e tasi lā tatou mataupu, o nai fesili ia e fesoasoani i le fa'amanatu, ae pule lava lau Sususga i se isi faiga.

1. O ai lea e fa'atua iai le leoleo mamoe lelei?

Tali: O Iesu le pepe o le Kerisimasi.

2. O le ā se va'aiga i leoleo mamoe o Isaraelu?

Tali: E fai ā le mea e manatu iai, i le va'aiga o mamoe..

3. O ai la ē fa'asino iai e Iesu lana lafu?

Tali: O tagata o lona nu'u o Isaraelu.

4. O fea lea e manatu Iesu e ave iai lana lafu?

Tali: Ua ia fa'apopotoina i latou mai nu'u esecese ma fagina i latou i mauga o Isaraelu.

5. O le ā le mea e ta'u o le ta'aga?

Tali: O le lafu mamoe e nonofo fa'atasi i totonu o se pa, e malu puipua ai.

Manuia tele le Kerisimasi ma le tausaga fou

.....

MALŌ LE ONOSA'I I LENEI TAUSAGA A'OGA UA FA'AI'UINA, FA'AFETAI ALOLOFA I FANAU A LE EKALESIA MA LE ATUNU'U, O OUTOU FAIVA E LĒ FAIGOFIE AUĀ O LE UPU MONI, E LĒ TOTOGIA LE GALUEGA, A'O LO OUTOU ALOFA INA IA AUA NE'I MULIMULI FANAU I TAUFĀ'ASESĒ O LE OLAGA. O LE TATALO LAVA IA MANUIA OUTOU UMA, MA IA IAI LE ALOFA O LE ATUA I FUAUFUAGA FAI. O LE Ā FO'I SE VAIVAI O LE AUAUNA, FA'ATELE E LE ATUA LAU FA'ASOA. MANUIA TELE LE KERISIMASI MA LE TAUSAGA FOU. AMENE!

